



**Naalakkersuisut kingusinnerpaamik UKA 2018-mut ileqqussaasunik siunnersuisooqatigiinnik pilersitsinissamut siunnersuisioqqullugu Inatsisartut aalajangiiffigisassaattut siunnersuut.**

(Inatsisartunut ilaasortaq Bendt B. Kristiansen, Inuit Ataqtigiit)  
(Siullermeerneqarnera)

Politikeritut eqqarsarluaqqaartassaagut allanik siunnersuisooqatigiinni pilersitsinialertinnata. Demokraatini nuannaarutigaarput assersuutigalugu Aningaasaqarneq pillugu Siunnersuisooqatigiinnit, Meeqqat pillugit Siunnersuisooqatigiinnit, Inuit Pisinnaatitaaffii pillugit Kalaallit Nunaanni Siunnersuisooqatigiinnit aamma Naligiisitaaneq pillugu siunnersuisooqatigiinni immersorneqartarnerput.

Siunnersuisooqatigiit taakku oqallinnissamut tunngavissiisarput aamma uangut maani Inatsisartuni issiasugut aalajangiiniarnitsinni tunngavissanik pitsaanerusunik pilersortarpaatigut.

Manna siunnersuut aqutigalugu IA-p siunnersuutigaa Ileqqussaasunik siunnersuisooqatigiinnik pilersitsisoqassasoq, siunnersuisooqatigiittut pioreersutut inuiaqatigiinni oqallinnermut akuusinnaasussanik aamma ileqqussaasunut tunngasunut apeqqutinut tunngatillugu innersuussinnaasussanik.

Demokraatini isumaqarpugut isumassarsiaq pissangartuusoq kisianni iluarinngilarput siunnersuuteqartup takorloormagu Naalakkersuisut ilaasortassanik toqqaasassasut. Kissaatigineruarput Naalakkersuisut ilaasortassamik ataatsimik toqqaasinnaassappata ilaasortassallu sinneri toqqarneqartarlutik kattuffinnit assigiinngitsunik aamma/imaluunniit siunnersuisooqatigiinnit allanit. Pingaarutilerujussuuvoq ileqqussaasunik siunnersuisooqatigiit politikikkut arlaannaannulluunniit attuumassuteqannginnissaat.

Tamatuma saniatigut siunnersuuteqartup aamma siunnersuisooqatigiinni ilaasortat ajunngitsorsiaqartinneqassanersut isummerfigisimanngilaa taamatullu allatseqartinneqassanersut. Tamarmik pngaaruteqarput misissorluarneqartariaqartut aalajngiitinnata ilumut isumassarsiaq manna piviusunngortissallugu pisariaqarnersoq.

Taamaattumik siunnersuutigissavarput ataatsimiititaliap susassaartup tamakku paasiniassagai allallu ajornartorsiutaasinnaasut, aalajangiivitsigata ileqqussaasumik siunnersuisooqatigiinnik pilersitsinissaq pillugu. Ataatsimiititaliap eqqarsaatigilluarsinnaavaa allannguutissamik siunnersuuteqassanerluni pillugu Naalakkersuisut peqquneqassasut misissoqqullugit



ileqqussaasumik siunnersuisoqatigiinnik pilersitsinerup iluaqtissartai akorngutissartaalu kiisalu aningaasatigut kingunerusussat.

Siunnersuut innersuupparput Ilaqtariinnermut Peqqissutsimullu Ataatsimiititaliamut.